

REGLUR

um greiðslur bóta fyrir eignir íslenzkra skipverja, þær er farizt hafa við sjóslys eða bruna.

1. gr.

Útgerðarmanni ber að greiða bætur fyrir eignir íslenzkra skipverja, þær er farizt hafa eða eyðilagzt við sjóslys eða bruna, og greiðast bæturnar eftir þeim reglum, sem hér fara á eftir.

2. gr.

Bæturnar skulu nema sannvirði eigna þeirra, er fórust eða eyðilögðust, og þó aldrei fara fram úr þeirri upphæð, sem hér á eftir greinir, nema samið hafi verið um hærrí bætur.

A. Á skipum í utanlandssiglingum, á flutninga- og farþegaskipum, 50 brúttórúmllestir eða stærri, í innanlandssiglingum, svo og varðskipum ríkisins, björgunar-skipum, dæluskipum og dýpkunarskipum:

I. Til skipstjóra	kr. 28000.00
II. Til annarra yfirmanna, að meðtöldum brytum og loftskeyta- mönnum	— 26500.00
III. Til annarra skipverja	— 25000.00

B. Á togurum og öðrum fiskiskipum, 50 rúmlestar eða stærri, í innanlandssiglingum og á veiðum:

I. Til skipstjóra	kr. 24600.00
II. Til annarra yfirmanna, að meðtöldum brytum og loftskeyta- mönnum	— 23300.00
III. Til annarra skipverja	— 22000.00

C. Á fiskiskipum 12—50 rúmllestir, í innanlandssiglingum og á veiðum:

I. Til yfirmanna	kr. 17000.00
II. Til annarra skipverja	— 16000.00
III. Á skipum 12 rúmllestir eða stærri, er skipverjar búa ekki í, til skipverja	— 8500.00

Upphæðir, sem um getur í A-, B- og C-liðum, skulu breytast samkvæmt fatnaðarlið vísitölu framfærslukostnaðar. Grunnupphæðir miðast við 150 stig.

3. gr.

Nú hefur skipverji misst bækur, sjófræðiahöld, smíðatól eða annað slíkt, er hann þurfti að hafa á skipi til þess að geta innt þar af hendi starf sitt, og hann átti sjálfur að leggja sér til, og skal þá útgerðarmaður bæta honum þessar eignir, umfram bætur þær er um ræðir í 2. gr.

4. gr.

Nú er sá maður látinn, er átti eignir þær, sem bæta skal, og ganga þá bæturnar til bús hans eða erfingja. Skal, er þannig stendur á, greiða hámark bóta samkvæmt 2. gr.

Sé sá, sem eignirnar átti, hins vegar á lífi, skal honum skylt að gefa, að viðlögðu drengskaparvottorði, skýrslu um muni þá, er hann hefur misst og sennilegt verð þeirra.

Reglur þessar, sem settar eru samkvæmt 3. mgr. 41. gr. sjómannalaga nr. 67 31. desember 1963, öðlast þegar gildi og birtist til eftirbreytni öllum þeim, sem hlut eiga að máli. Jafnframt falla úr gildi reglur um sama efni, nr. 13 30. janúar 1945.

Samgöngumálaráðuneytið, 21. febrúar 1964.

Emil Jónsson.

Brynjólfur Ingólfsson.

S A M Þ Y K K T

fyrir Veiðifélag Laxár í Borgarfjarðarsýslu.

1. gr.

Félagið heitir Veiðifélag Laxár í Borgarfjarðarsýslu. Heimili þess og varnarping er að Stóra Lambhaga.

2. gr.

Félagið nær til allra jarða, sem land eiga að Laxá og ósum hennar, en þær eru:

- | | | |
|--------------------|-----------------------|-------------------------|
| 1. Vestra Súlunes. | 14. Hliðarfótur. | 27. Stóri Lambhagi II. |
| 2. Eystra Súlunes. | 15. Eyri. | 28. Stóri Lambhagi III. |
| 3. Bakki. | 16. Kambshóll. | 29. Lambhagi. |
| 4. Skorholt. | 17. Glammastaðir. | 30. Litli Lambhagi. |
| 5. Skipanes. | 18. Dragháls. | 31. Fellsaxlarkot. |
| 6. Lækur. | 19. Geitaberg. | 32. Litla Fellsöxl. |
| 7. Beitistaðir. | 20. Þórisstaðir. | 33. Kjalardalur. |
| 8. Vogatunga. | 21. Saurbær. | 34. Arkarlækur. |
| 9. Melkot. | 22. Svarfhóll. | 35. Bekansstaðir. |
| 10. Leirá. | 23. Hurðarbak. | 36. Hvítanes I. |
| 11. Steinsholt. | 24. Vestra-Miðfell. | 37. Hvítanes II. |
| 12. Tunga. | 25. Hlið. | 38. Vallarnes. |
| 13. Hóll. | 26. Stóri Lambhagi I. | |

3. gr.

Verkefni félagsins er að viðhalda góðri fiskgengd á félagssvæðinu og leigja það til stangaveiði.

Aðalfundi er heimilt að leyfa takmarkaða netaveiði á ósasvæði Laxár, enda sé þá tekið tillit til þeirrar veiði við úthlutun arðs.

Félagið getur látið stunda sameiginlega veiði á einum eða fleiri stöðum ef svo ber undir.

4. gr.

Stjórn félagsins skipa fimm menn. Formaður og fjórir meðstjórnendur, skulu þeir kosnir á aðalfundi til þriggja ára í senn, ganga þeir úr stjórn á víxl þannig, að formaður gengur út eftir eitt ár, tveir meðstjórnendur eftir tvö ár og hinir tveir eftir þrjú ár, og helst svo sama röð áfram.